

صراع أفكار

يافكرة مع خواتها .
كل يوم في صراع
يافكرة بدور على ذاتها .
ومش بقتاع
يافكرة بدور على بيتها .
يكون تمليك ومش متباع
يافكرة عزمها بإيدها .
مش هامش ومش أتباع

قالولها خواتها إيه الموضوع
بتتهمينا ليه بخضوع
ماإحنا قولنا كتير وقبليكي
وعزّمنا في ثانية كان إتباع
ليه بتفكرينا بالذكري
وكان أملنا في يوم بكرة
كفاية بقى بلاش أوجاع

ردت عليهم بتهيدة
وبكلمة قوية وشديدة
إنتوا إلی قبلتوا يوم بضیاع
إنتي .مثلا .كان املك تبقي .کیان
له إسم كبير . وله عنوان
ولا ف عمرک . يوم تشکي
م الذل والقهر والحرمان
ليه قبلتي تتسرقني
من صاحبك وتتحرقني

وإنتي . قالوا عليکي مجنونة
ووصفوكي بوصمة عار
ونبذوكي وقالوا ياناس دي ملعونة
وكان جواهم بحور أسرار
وخبوكي وخلوكي
أسيرة ضعيفة مسجونة
ولما الناس نسيوكي
عاروكي وعرضوكي .
بألف نهار

وانتي ياللي بتقولني معذورة
وكان عليكي العين ومنظورة
ولما تمكنوا منك .
ف لحظة بقيت مهدورة
يافكورة ياشطورة إزاي تأمني للأشرار

ياخواتي . ده كلكوا بذرة
لما تلاقى الأرض تصير أشجار
ماهو أنا منكوا وكمان بينكوا
لكن حرة ومش ضحية عشان أنهار

أنا مش فريسة سهلة وجريحة
أنا كلمة واضحة وصريحة
ومليش في اللف والأعذار
أنا سهم نافذ في أسواره
مشدود على القوس بمعياره
ولازم هايكمل في مشواره
ولو حوطوه بألف جدار
ومهما طالت الأعمار

ولو حتى إترميت في النار
هايفضل صوتي في صدايا
وعزميتي صلبة جوايا
ولو اللسان إترس
الهوا هيردد. ورايا
ويقول هو ده ندا. الأفكار
مين يقدر يقتل الفكرة
ونبع الفكرة كما الإعصار
مين يقدر يقتل الفكرة
ونبع الفكرة كما الإعصار